

四庫全書

史部

欽定四庫全書

舊五代史卷九十六

宋門下侍郎參知政事監修國史薛居正等撰

晉書第二十二

列傳十一

孔崇弼唐僖宗宰相緯之子也仕後唐自吏部郎中授給事中時族兄昭序繇給事中改左常侍兄弟同居門下時論榮之崇弼天福中遷左散騎常侍無他才但能

談笑戲玩人物揚眉抵掌取悅于人五年詔令泛海使  
于杭越先是浙中贈賄每歲恒及萬緡時議者曰孔常  
侍命奇薄何消盈數有命即無財有財即無命明年使  
還果海中船壞空手而歸

案以下  
殘闕

陳保極閩中人也好學善屬文後唐天成中擢進士第  
秦王從榮聞其名辟為從事從榮素急暴後怒保極不  
告出遊宰相門以馬箠鞭之尋出為定州推官從榮敗  
執政知其屈擢居三署歷禮部倉部員外郎初桑維翰

登第之歲保極時在秦王幕下因戲謂同輩曰近知今  
歲有三箇半人及第蓋其年收四人保極以維翰短陋  
故謂之半人也天福中維翰既居相位保極時在曹郎  
慮除官差跌心不自安乃乞假南遊將謀退跡既而襄  
鄧長吏以行止入奏維翰乃奏于高祖曰保極閩人多  
狡恐逃入淮海即以詔追赴闕將下臺鍛成其事同列  
李崧極言以解之因令所司就所居鞠之貶為衛尉寺  
丞仍奪金紫尋復為倉部員外郎竟以銜憤而卒保極

無時才有傲人之名而性復鄙恠所得利祿未嘗奉身  
但蔬食而已每與人奕棊敗則以手亂其局蓋拒所賭  
金錢不欲償也及卒室無妻兒唯囊中貯白金十錠為  
他人所有時甚嗤之

王瑜其先范陽人也父欽祚仕至殿中監出為義州刺  
史瑜性兇狡然雋辯驍果騎射刀筆之長亦稱于當代  
起家累為從事天福中授左贊善大夫會濮郡秋稼豐  
衍稅籍不均命乘使車按察大計既至郡謂校簿吏胡

蘊惠鶚曰余食貧久矣室無增貲為我致意縣宰且求假貸由是濮之部內五邑令長共斂錢五十萬私獻于瑜瑜即以書上奏高祖覽章歎曰廉直清慎有如此者誠良臣也于是二吏五宰即時停黜擢瑜為太府少卿杜重威之鎮東平也瑜父欽祚為節度副使及重威移鎮常山瑜乃詭計干重威使奏已為恒州節度副使竟代其父位歲餘入為刑部郎中丙午歲父欽祚刺舉義州瑜歸寧至郡會契丹據有中夏何建以秦州歸蜀瑜

說欽祚曰若不西走當事契丹矣厲色數諫其父怒而不從因其臥疾涉旬瑜仗劍而脅之曰老懦無謀欲趨炮烙不即為計則死于刃下父不得已而聽之時隴東屯兵扼其川路將北趣蕃部假途而因與郡盜酋長趙徽歃血為約以兄事之謂徽曰西至成都余身為相余父為將爾當領一大郡能遂行乎徽曰諾瑜慮為所賣先致其妻孥館于郡中行有期矣徽潛召其黨伺于郊外子夜瑜舉族行而輜重絡繹十有餘里徽之所覩循

溝澮而遁至馬峽路隅舉燧相應其黨起于伏莽斷欽  
祚之首貫諸長矛平生聚蓄金幣萬計皆為賊所掠少  
長百口殺之殆盡瑜尚獨戰千人矢不虛發手無射捍  
其指流血及窟乃夜竄山谷落髮為僧月餘為樵人所  
獲繫送岐州為侯益所殺時年三十九始瑜有姑寡居  
來歸其家以前夫遺腹有子經數年不產每因事預告  
人吉凶無不驗者時契丹入中原前月餘謂瑜曰暴兵  
將至宜速去之苟不去亂必及矣後瑜果死此謂天作



孽猶可違自作孽不可活也

張繼祚故齊王全義之子也始為河南府衙內指揮使  
全義卒除金吾將軍旋授蔡州刺史累官至檢校太保  
明宗郊天充供頓使復除西衛上將軍唐清泰末丁母  
憂天福初喪制未闋會張從賓作亂發兵迫脅取赴河  
陽令知番守事從賓敗與二子詔戮于市始繼祚與范  
延光有舊嘗遣人以馬遺之屬朝廷起兵將討鄴城為  
巡兵所獲奏之高祖深忌之及敗宰臣桑維翰以父珙

早事齊王奏欲雪之高祖不允

通鑑史館修撰李濤上言張全義有再造洛邑

之功乞免其族遂止誅繼祚妻子

遂止罪繼祚一房不累其族

鄭阮洺州人也少為本郡牙將唐莊宗畧地山東以阮首歸義旗繼遷軍職阮有子自幼事明宗中門使安重誨重誨以其桀黠愛之及明宗即位擢阮至鳳翔節度副使會末帝鎮其地阮稍狎之末帝嗣位以阮為趙州刺史而阮性貪濁民間細務皆密察而紀之令納賂以贖罪有屬邑令因科醵拒命密以束素募人陰求其過

後竟停其職人甚非之又嘗以郡符取部內凶肆中人隸其籍者遣于青州昇喪至洺郡人憚其遠願輸直百緡以免其行阮本無喪即受直放還識者曰此非吉兆也未幾改曹州刺史為政愈弊高祖建義入洛阮自郡來朝旋為本州指揮使石重立所殺舉族無孑遺

胡饒大梁人也少事本鎮連帥為都吏歷馬步都虞候會唐明宗鎮其地與部將王建立相善明宗即位建立領常山奏饒為真定少尹饒本儉人既在府幕無士君

子之風嘗因事趙郡有平棘令張鵬者獻策請建立于  
境內每縣所管鄉置鄉直一人令月書縣令出入行止  
饒乃導而薦焉建立行之彌年詞訟蜂起四郡大擾天  
成末王都搆亂陰使結建立為兄弟之國時饒又曾薦  
梁時右庶子張澄為判官建立亦狎之澄素不知書每  
座則以陰符鬼谷為已任建立時密以王都之盟告之  
澄與饒俱贊成其事會王師圍中山其事遂寢而饒之  
允戾如此清泰初馮道出鎮同州饒時為副使道以重

臣稀于接洽饒愈之每乘酒于牙門詬道道必延入待以酒餚致敬而退道謂左右曰此人為不善自當有報吾何怒焉饒後閒居河陽天福二年夏會張從賓作亂饒謁于麾下請預其行從賓敗饒以王建立方鎮平盧走投之建立延入城斬之以聞聞者快焉

劉遂清字得一青州北海人梁開封尹鄴之猶子也父琪以鴻臚卿致仕遂清少敏惠初仕梁為保鑾軍使歷內諸司使莊宗入汴不改其職明宗即位加檢校尚書

僕射委以西都監守踰歲以中山王都有不臣之跡除  
遂清為易州刺史俾遏其寇衝既至郡大有禦侮之略  
境內賴焉王都平加檢校司空遷棣州刺史天成長興

中歷典淄興登三郡咸有善政

通鑑潞王紀帝之起鳳翔也召興州刺史劉遂

清遲疑不至聞帝入洛乃悉集三泉西縣金林桑林戍兵以歸自散關以南城鎮悉棄之皆為蜀人所入朝  
帝欲治罪以其能自歸乃赦之高祖即位之二年授鳳州防禦使加檢

校司徒會丁母憂起復授內客省使右監門衛大將軍  
六年駕幸鄴都轉宣徽北院使兼判三司加檢校太保

七年少帝嗣位加右領軍衛上將軍仍賜竭誠翊戴保節功臣八年出領鄭州加檢校太傅開運二年遷安州防禦使未幾上表稱疾詔許就便迴至上蔡終于郵舍時三年四月也遂清性至孝牧溜川日自北海迎其母赴郡母既及境遂清奔馳路側控轡行數十里父老觀者如堵當時榮之遂清素不知書但多計畫判三司日每給百官俸料與判官議曰斯輩非盡有才能多世祿之家宜澄其污而留其清者或對曰昔唐朝渾郭顏段

每一赦出一子出身率為常制且延賞垂裕為國美譚未有因月給而欲沙汰恐未當也羣倫由此減之

房曷京兆長安人也少為唐宰臣崔魏公家臣後因亂客于蒲州天成中唐末帝出鎮河中曷于路左迎謁求事軍門末帝愛之使治賓客及末帝登極歷南北院宣徽使尋與趙延壽同為樞密使時薛文遇劉延朗之徒居中用事曷雖處密地其聽用之言十不得三四但隨勢可否不為事先每朝廷有大事曷與端明學士等環



坐會議多于衆中俛首而睡其避事也如此高祖即位以曷濡足閏朝不專予奪故特恩原之命為左驍衛大將軍留于西京開運元年春卒于洛陽

孟承誨大名人也始為本府牙校遇高祖臨其地升為客將後奏為宗城令秩滿以百姓舉留于常山橐地令皆有善政高祖有天下擢為閤門副使累遷宣徽使官至檢校司空太府卿右武衛大將軍及少帝嗣位以植性纖巧善于希旨復與權臣宦官密相表裏凡朝廷恩

澤美使必承誨為之一歲之中數四不已由是居第華  
敞財帛積累及契丹入汴張彥澤引兵逼宮城少帝召  
承誨計之承誨匿身不赴少帝既出宮寓于開封府舍  
具以承誨背恩之事告彥澤令捕而殺之其妻女並配  
部族漢高祖即位詔贈太保

劉繼勳衛州人也唐天成中高祖鎮鄴都繼勳時為客  
將高祖愛其端謹籍其名于帳下從厯數鎮及即位擢  
為閤門使出為淄州刺史遷澶州防禦使俄改鄭州自

宣徽北院使拜華州刺史歲餘移鎮同州始少帝與契丹絕好繼勳亦與其謀及契丹主至闕繼勳自鎮來朝契丹責之時馮道在側繼勳事急指道曰少帝在鄴道為首相與景延廣謀議遂致南北失歡臣位至卑未嘗措言今請問道道細知之契丹主曰此老子不是好鬧人無相牽引皆爾輩為之繼勳不敢復對繼勳時有疾契丹主因令人候其疾狀云有風痺契丹主曰北方地涼居之此疾可愈乃命鑠繼勳尋解之以疾終于家

通鑑

契丹主聞趙在禮死乃  
釋繼勳繼勳憂憤而卒漢高祖入汴贈太尉

鄭受益

新唐書宰相世系表字謙光

唐宰相餘慶之曾孫也餘慶生

澣澣生從諱兩為太原節度使再登相位從諱兄處誨  
為汴州節度使家醜清儉深有士風中朝禮法以鄭氏  
為甲處誨生受益受益亦以文學致身累厯臺閣自尚  
書郎遷右諫議大夫天福七年夏以張彥澤數為不道  
上章請行國典旬日不報又貢表切言訐直無所忌執  
政稍惡之俄而以病請告歸長安高祖晏駕以不赴國

哀停任會赦拜京兆少尹宰臣趙瑩出鎮咸秦以受益  
朝班舊僚眷待甚至屬天下率借金穀乃謂瑩曰京兆  
戶籍登耗民力虛實某備知之矣品而定之可使平允  
瑩信之因使與王人同掌其事受益既經廢薄于仕宦  
遂阿法射利冀為生生之資又素恃門望陵轢同幕內  
奸外直羣情無相洽者及賦污事發騰于衆口瑩不得  
已遂按之其直百萬八年冬賜死于家受益數世公台  
一朝自棄士君子皆惜之

程遜字浮休壽春人

以下有闕文

召入翰林充學士自兵部

侍郎承旨授太常卿天福三年秋命使吳越

十國春秋云禮部尚

書程遜為加恩使

母羸老雙瞽遜未嘗白執政以辭之將行母

以手捫其面號泣以送之仲秋之夕陰暝如晦遜嘗為詩曰幽室有時聞鴈叫空庭無路見蟾光同僚見之訝其詩語稍異及使迴遭風水而溺焉

李郁字文緯唐之宗屬也少歷宗寺官天成長興中累遷為宗正卿性平允所歷無愛憎毀譽高祖登極授光

祿卿一日晝寢夢食巨棗覺而有疾謂其親友曰嘗聞棗字重來呼魂之象也余神氣逼抑將不免乎天福五年夏卒贈太子太保

馬重績字洞微少學數術明太一五紀八象三統大厯居于太原仕晉拜太子右贊善大夫遷司天監天福三年重績上言厯象王者所以正一氣之元宣萬邦之命而古今所記考審多差宣明氣朔正而星度不驗崇玄五星得而歲差一日以宣明之氣朔合崇玄之五星二

歷相參然後符合自前世諸歷皆起天正十一月為歲  
首用太古甲子為上元積歲愈多差濶愈甚臣輒合二  
歷創為新法以唐天寶十四載乙未為上元雨水正月  
中氣為氣首詔下司天監趙仁琦張文皓等考覈得失  
仁琦等言明年庚子正月朔用重續歷考之皆合無舛  
乃下詔頒行之號調元歷行之數歲輒差遂不用重續  
又言漏刻之法以中星考晝夜為一百刻八刻六十分  
刻之二十為一時時以四刻十分為正此自古所用也



今失其傳以午正為時始下侵未四刻十分而為午由是晝夜昏曉皆失其正請依古改正從之重績卒年六十四

陳玄京兆人也家世為醫初事河中王重榮乾符中後唐武皇自太原率師攻王行瑜路出于蒲中時玄侍湯藥武皇甚重之及還太原日侍左右武皇性剛暴樂殺人無敢言者玄深測其情每有暴怒則從容啟諫免禍者不一以是晉人深德之勳貴賂遺盈門性好酒樂施

隨得而無私積明宗朝為太原少尹入為太府卿長興中集平生所驗方七十五首并修合藥法百件號曰要術刊石置于太原府衙門之左以示于衆病者賴焉天福中以耄期上表求退以光祿卿致仕卒于晉陽年八十餘

史臣曰夫彰善癉惡麟史之為義也瑜不掩瑕虹玉之為德也故自崇弼而下善者既書之其不善者亦書之庶使後之君子見善如不及見惡如探湯也至如重績

之歷法陳玄之醫道亦不可漏其名而弗紀也

舊五代史卷九十六

舊五代史卷九十六攷證

晉列傳十一孔崇弼傳 案新唐書世系表作昌弼字

佐化是書作崇弼益避後唐廟諱改

時族兄昭序 案新唐書世系表作昌序字昭舉是書  
作昭序疑亦因避諱而改也

程遜傳天福三年秋命使吳越及使迴遭風水而溺焉

案通鑑攷異晉實錄天福二年十一月加錢元瓘副  
元帥國王程遜等為加恩使四年十月丙午以程遜

没于海廢朝贈官程遜傳云天福三年秋使吳越使  
回溺死元瓘傳云天福三年封吳越國王蓋三年冬  
制下遜等以三年至杭州不知溺死在何年而晉朝  
以四年十月始聞之也

馬重績傳八象三統 三統原本作三紀今從歐陽史  
改正

舊五代史卷九十六攷證

欽定四庫全書

舊五代史卷九十七

宋門下侍郎參知政事監修國史薛居正等撰

晉書第二十三

列傳十二

范延光字子環鄴郡臨漳人也少隸于郡牙唐明宗收  
相州收為親校同光中明宗下鄆州梁兵屯楊劉口以  
扼之先鋒將康延孝潛使人送款于明宗明宗欲使人

達機事于莊宗方難其選延光請行遂以蠟書授之延光既至奏莊宗曰楊劉渡控扼已定未可圖也請築壘馬家口以通汶陽之路莊宗從之復遣歸鄆州俄而梁將王彥章攻馬家口所築新壘明宗恐城中不脩又遣間行告莊宗請益兵中夜至河上為梁兵所獲送夷門下獄榜笞數百處以白刃終不洩其事復為獄吏所護在獄半年不復理問及莊宗將至汴城獄吏即去其桎梏拜謝而出之乃見于路側莊宗喜授銀青光祿大夫

檢校工部尚書明宗登極擢為宣徽使與霍彥威平青州王公儼遷檢校司徒明宗之幸夷門也至滎陽聞朱守殷拒命延光曰若不急攻賊堅矣請騎兵五百臣先赴之則人心必駭明宗從其請延光自酉時至夜央馳二百餘里奄至城下與賊交鬪翌日守陴者望見乘輿乃相率開門延光先入與賊巷戰至厚載門盡殲其黨明宗喜之明年遷樞密使權知鎮州軍府事尋正授節旄加檢校太保長興中以安重誨得罪再入為樞密使



加同平章事既而以秦王從榮不軌恐及其禍屢請外任明宗久之方許遂出鎮常山清泰中復詔為樞密使未幾出為汴州節度使會魏府屯將張令昭逐其帥劉延皓據城以叛唐末帝命延光討而平之遂授鄴都留守加檢校太師兼中書令門下有術士張生自云妙通術數當延光微時言將來必為將相延光既貴酷信其言歷數鎮常館于上舍延光謂之曰余夢大蛇自腹入腹半而掣去之是何祥也張生曰蛇者龍也入腹為

帝主之兆明矣延光自是稍萌僭竊之意及高祖建義于太原唐末帝遣延光以本部二萬屯遼州與趙延壽犄角合勢及延壽兵敗延光促還故心不自安高祖入洛尋封臨清王以寬其反側後延光擅殺齊州防禦使祕瓊而聚兵部下復收部內刺史入城高祖甚疑之乃東幸夷門時延光有牙校孫銳者與延光有鄉曲之舊軍機民政一以委焉故魏博六州之賦無半錢上供符奏之間有不如意者銳即對延光毀之其兇戾也如此

初朝廷遣使封延光為臨清王因會寮屬延光暴得疾  
伏枕經旬銳乃密惑群小召澶州刺史馮暉等以不臣  
之謀逼于延光延光亦惑于術者因而聽之天福二年

夏六月遣銳與暉將步騎二萬南抵黎陽

通鑑云延光以馮暉為都

部署以孫銳為兵馬都監

時銳以女妓十餘輩從之擁蓋操扇必歌

吹而後食將士煩熱覩之解體尋為王師所敗賊眾退  
還鄴城高祖繼遣楊光遠討之延光知事不濟乃殺孫  
銳以歸其罪發人齋表待罪且邀姑息高祖不許及經

歲受圍城中飢窘高祖以師老民勞思解其役遣謁者入謂之曰卿既危蹙破在旦夕能返掌轉規改節歸我我當以大藩處之如降而殺之則何以享國明明白日可質是言因賜鐵券改封高平郡王移鎮天平延光謂門人李式曰主上敦信明義言無不踐許以不死則不死矣因撤去守備

通鑑延光猶遷延未決宣徽南院使劉處讓復入論之延光意乃決素

服請降及赴汶上踰月入覲尋表請罷免高祖再三答諭方允制以延光為太子太師致仕居闕下期歲高祖

每召賜飲宴待之與羣臣無間一日從容上奏願就河陽私邸以便順養高祖許之延光攜妻子輦奇貨從焉每過郡邑多爲關吏所紕時楊光遠居守洛下兼領孟懷既利其財復漸測朝廷密旨遂奏云延光國之奸臣若不羈縻必北走胡南入吳請召令西都居止高祖允之光遠使其子承勲以兵環其第逼令自裁延光曰明天子在上賜金書許我不死爾之父子何得脅制如此明旦則以白刃驅之令上馬之浮橋排于水中光遠給

奏云延光投河自溺而死水運軍使曹千獲其屍于郡東繆家灘高祖聞之輟朝二日詔許歸葬于鄴仍贈太師延光初為近臣及領重鎮禮賢接士動皆由禮故甚獲當時之譽洎鎮常山日以部將梁漢唐獲王都名馬入罪而取之在魏州日以齊州防禦使秘瓊獲董溫琪珠金妓妾及經其境復害而奪之物謾由是減之及懼罪以謀叛復忍耻以偷生不能引決遂至強死何非夫之甚也

張從賓未詳何許人也始事唐莊宗為小校從戰有功唐天成中自奉聖指揮使領澄州刺史遷左右羽林都校從藥彥稠討楊彥溫于河中平之長興中領壽州忠正軍節度使加檢校太保侍衛步軍都指揮使從賓素便佞每進言明宗多納之有供奉官丁延徽者性貪狡時奉詔監廩以犯贓下獄權貴多為救解明宗怒不許從賓因奏他事言及延徽明宗曰非但爾言蘓秦說予亦不得也延徽竟就戮長興末從賓出鎮靈武加檢校

大傅高祖即位受代入覲會駕東幸留從賓警巡洛下  
一日逢留司御史于天津橋從兵百人不分路而過排  
御史于水中從賓給奏其酒醉其兇傲如此及范延光  
據鄴城叛詔從賓爲副部署使從楊光遠同討延光會  
延光使人誘從賓從賓時在河陽乃起兵以應之先害  
皇子重信及入洛又害皇子重入取內庫金帛以給部  
伍因東據汜水關且欲觀望軍勢高祖命杜重威侯益  
分兵討之從賓大敗乘馬入河溺水而死焉



張延播者汶陽人也始爲郡之牙將唐同光初明宗下  
郿城因收隸左右天成中累授檢校司空兩河發運營  
田使郴州刺史長興元年出牧蔡州加檢校司徒入爲  
左領軍衛大將軍充客省使伐蜀之役命爲馬軍都監  
三年遷鳳州防禦使西面水陸轉運使高祖卽位除東  
都副畱守車駕幸汴遣兼洛京巡檢使張從賓作亂令  
延播知河南府事從賓敗伏誅

楊光遠小字阿檀及長止名檀唐天成中以明宗改御

名為亶以偏傍字犯之始改名光遠字德明其先沙陀部人也父阿瞪啜後改名城事唐武皇爲隊長光遠事莊宗爲騎將唐天祐中莊宗遣振武節度使周德威圍劉守光于幽州因令光遠隸於德威麾下後與德威拒契丹于新州率軍以深入致敗因傷其臂遂廢罷於家莊宗即位思其戰功命爲幽州馬步軍都指揮使檢校尚書右僕射戍瓦橋關久之明宗朝歷嬀瀛易冀四州刺史光遠雖不識字然有口辨通于吏理在郡有政聲

明宗頗重之長興中契丹有中山之敗生擒其將札拉等數十人送于闕下其後契丹既通和遣使乞歸之明宗與大臣謀議特放還番一日召光遠於便殿言其事光遠曰扎拉等北土之善戰者彼失之如喪手足又在

此累年脩諳中國事若放還非便明宗曰番人重盟誓既通歡好必不相負光遠曰臣恐後悔不及也明宗遂止深嘉其抗直後自振武節度使移鎮中山累加檢校太傅將兵戍蔚州高祖舉義于太原唐末帝遣光遠與

張敬達屯兵于城下俄而契丹大至爲其所敗圍其寨久之軍中糧盡光遠乃與次將安審琦等殺敬達擁衆歸命從高祖入洛加檢校太尉充宣武軍節度使同平章事判六軍諸衛事是時光遠每對高祖常悵然不樂高祖慮有不足密遣近臣訊之光遠附奏曰臣貴為將相非有不足但以張生鐵死得其所臣弗如也采心內愧是以不樂生鐵蓋敬達之小字也高祖聞其言以光遠爲忠純之最者也其實光遠故爲其言以邀高祖之

重信也明年范延光據鄴城叛高祖命光遠率師討之將濟河會滑州軍亂時軍衆欲推光遠為主光遠曰自古有折臂天子乎且天子蓋公輩販弄之物晉陽之降乃勢所窮迫今若為之直反賊也由是其下惕然無復言者高祖聞之尤加寵重光遠既圍延光尋授魏博行府節度使兵柄在手以為高祖懼已稍干預朝政或抗有所奏高祖亦曲從之復下詔以其子承祚尚長安公主次子承信皆授美官恩渥殊等為當時之冠桑維翰

爲樞密使往往彈射其事光遠心銜之及延光降光遠  
入朝面奏維翰擅權高祖以光遠方有功于國乃出維  
翰鎮相州光遠爲西京留守兼鎮河陽因罷其兵權光  
遠由是怨望潛貯異志多以珍玩奉契丹訴己之屈又  
私養部曲千餘人撓法犯禁河洛之人恒如偸盜尋冊  
拜太尉兼中書令時范延光致仕輦囊裝妓妾居于河  
陽光遠利其奇貨且慮爲子孫之讎因奏延光不家汴  
洛出舍外藩非南走淮夷則北走契丹宜早除之高祖

以許之不死鐵券在焉特疑未允光遠乃遣子承勲以甲士圍其第逼令自殺延光曰天子在上安得如此乃遣使者乞移居洛下行及河橋擯于流而溺殺之矯奏云延光自投河朝廷以適會其意弗之理後踰歲入覲高祖為置曲宴教坊伶人以光遠暴斂重賦因陳戲譏之光遠殊無慙色高祖謂光遠曰元城之役卿左右皆立功未曾旌賞令各與一郡俾釐任以榮之因命為刺史者凡數人時王建立自青州移鎮上黨乃以光遠為

平盧軍節度使封東平王光遠而奏請與長子同行尋授承勲萊州防禦使及赴任僕從妓妾至千餘騎滿盈僭侈為方岳之最下車之後惟以刻剝為事少帝嗣位

冊拜太師封壽王

宋史馬仁鎬傳晉天福中青州楊光遠將國不軌以仁鎬為節度副使伺

其動靜歷二年或謂仁鎬于朝改護國軍行軍司馬仁鎬至河中及數月光遠反書聞

後因景延

廣上言請取光遠麾下所借官馬二百匹光遠怒曰此馬先帝賜我何以復取是疑我也遂遣人潛召次子承祚自單州奔歸朝廷乃就除淄州刺史以從其便光遠



益驕因此搆契丹述少帝違好之短且言大飢之後國  
用空虛此時一舉可以平定開運元年正月契丹南牧  
陷我博陵少帝幸檀淵三月契丹退命李守貞符彥卿  
率師東討光遠素無兵衆唯嬰城自守守貞以長連城  
圍之冬十一月承勲與弟承信承祚見城中人民相食  
將盡知事不濟勸光遠乞降冀免于赤族光遠不納曰  
我在代北時嘗以紙錢駝馬祭天池皆沉没人言合有  
天子分宜且待時勿輕言降也承勲慮禍在朝夕與諸

弟同謀殺節度判官邱濤親校杜延壽楊贍白延祚等  
梟其首乃遣承祚送于守貞因縱火大譟劫其父幽于  
私第以城納款遣即墨縣令王德柔貢表待罪光遠亦  
上章自首少帝以頃歲太原歸命欲曲全之執政曰豈  
有逆狀滔天而赦之也乃命守貞便宜處置守貞遣人  
拉殺之以病卒聞歐陽史守貞遣客省副使河延祚殺之于其家漢高祖即位  
詔贈尚書令追封齊王仍令立碑未幾其碑石無故自  
折可知其陰責也

五代史補楊光遠滅范延光之後朝廷以其功高授青州節度封東平王

奄有登萊沂密數郡既而自負強盛舉兵反朝廷以宋州節度李守貞嘗與光遠有隙乃命李討之李受詔欣然志在必取莫不身先矢石光遠見而懼之度不能禦遂降初光遠反書至中外大震時百官起居次忽有朝士揚言于衆曰楊光遠欲謀大事吾不信也光遠素患禿瘡其妻又跛自古豈有禿頭天子跛脚皇后耶于是人心頓安未幾光遠果降

承勲光遠之長子也始名承貴避少帝名改爲以父廕歷光濮州刺史光遠兼鎮河陽命制置三城事光遠移鎮青州授萊州防禦使在郡亦頗理嘗憤父側之奸黨欲殺之每省父父爲匿焉及光遠構釁嬰城以叛承勲

赴之敵退為王師所圍踰歲糧盡與其弟承祚背父之

命出降王師朝廷授汝州防禦使尋改鄭州

宋史楊承信傳光遠

死承信與弟承祚詣闕請死詔釋之以承信為右羽林將軍承祚為右驍衛將軍放歸服喪私第尋安置鄭州

及戎王入汴遣騎士自圃田召至責其害父背已使嚮其肉而殺之以其弟承信為青州節度使

盧文進字國用范陽人也身長七尺飲啖過人望之偉如也少事劉守光為騎將唐莊宗攻燕以文進首降遙授壽州刺史初莊宗得山後八軍以愛弟存矩為新州

團練使以總領之莊宗與劉鄩對壘于莘縣命存矩于  
山後召募勁兵又令山北民各出戰馬器仗每鬻牛十  
頭易馬一匹人心怨咨時存矩團結五百騎令文進將  
之與存矩俱行至祁溝關軍士聚謀曰我輩邊人棄父  
母妻子為他血戰千里送死固不能也眾曰擁盧將軍  
却還新州據城自守奈我何因大呼揮戈趣傳舍害存  
矩于榻下文進撫膺曰奴輩累我矣因環尸而泣曰此  
輩既害郎君我何面目見王

契丹國志云存矩取文進  
女為側室文進心常內愧

因與亂軍

殺俘矩 因爲亂軍所擁反攻新州不克

馬令南唐書文進攻新州

夜走墜塹一躍而出明日視之乃郡之黑龍潭也絕岸數丈深不可測又嘗有大蛇徑至崖間引首及膝文進取食飼之而去由是自負又攻武州又不利周德威命將征討文進

遂奔契丹命爲幽州兵馬留後部分漢軍常別爲營寨

未幾文進引契丹寇新州自是戎師數至驅擄數州士

女教其織紵工作中國所爲者悉倭契丹所以強盛者

得文進之故也

契丹國志云文進引契丹軍攻新州刺史安金全不能守棄城去周德威援之

進攻新州契丹衆數萬德威不勝大敗奔歸文進與契丹進攻幽州且二百日城中危困晉王親將兵救之方

始解去契丹以文進為幽州節度使又以為盧龍節度使

同光之世為患尤深文進

在平州率奚族勁騎烏擊獸搏倏來忽往燕趙諸州荆榛滿目軍屯涿州每歲運糧自瓦橋至幽州勁兵猛將援遮糧草然猶為契丹所鈔奔命不暇皆文進導之也及明宗即位之明年文進自平州率所部十餘萬眾來奔行及幽州先遣使上表曰頃以新州團練使李存矩提衡郡邑掌握恩威虐黎庶則毒甚于豺狼聚賦歛則貪盈于溝壑人不堪命士各離心臣即拋父母之邦入

朔漠之地幾年鴈塞徒向日以傾心一望家山每銷魂  
而斷目李子卿之河畔空有怨辭石季倫之樂中莫陳  
歸引近聞皇帝陛下皇天眷命清明在躬握紀乘乾鼎  
新萃故始知大幸有路朝宗便貯歸心祇伺良會臣十  
月十日決計殺在城契丹取十一日離州押七八千車  
乘領十五萬生靈十四日已達幽州云泊至洛陽明宗  
寵待彌厚授滑州節度使檢校太尉歲餘移鎮鄧州累  
加同平章事入為上將軍長興中復出鎮潞州擒奸郅



隱甚獲當時之譽清泰中改安州節度使及高祖即位

與契丹敦好文進以嘗背契丹居不自安

馬令南唐書文進居數鎮

頗有善政兵民愛之其將行也從數騎至營中別其裨將李藏機告以避契丹之意將士皆拜為訣

天福

元年十二月乃殺行軍司馬馮知北節度副使杜重貴

等率其部眾渡淮奔于金陵李昇待之尤重

馬令南唐書云烈祖

以文進為天雄統軍

偽命為宣州節度使後卒于江南

金陵志文進自潤州

召還以左衛上將軍兼中

書令范陽郡王奉朝請

李金全本唐明宗之小豎也其先出于吐谷渾金全驍

勇善騎射少從明宗征伐以力戰有功明宗即位連典  
大郡天成中授涇州節度使在鎮數年以掊歛為務長  
興中受代歸闕始進馬數十匹不數日又進之明宗召  
而謂之曰卿患馬多耶何進貢之數也又謂曰卿在涇  
州日為理如何無乃以馬為事否金全慚謝而退四年  
夏授滄州節度使累官至檢校太傅清泰中罷鎮歸闕  
久留于京師高祖即位之明年安州屯將王暉殺節度  
使周瓌詔遣金全以騎兵千人鎮撫其地未及境暉為

部下所殺金全至亂軍數百人皆不自安金全說遣赴  
闕密伏兵于野盡殺之又擒其軍校武彥和等數十人  
斬之初金全之將行也高祖戒之曰王暉之亂罪莫大  
焉但慮封守不寧則民受其弊因折矢飛詔約以不戮  
一人仍許以暉為唐州刺史又謂金全曰卿之此行無  
失吾信及金全至聞彥和等當為亂之日劫掠郡城所  
獲財貨悉在其第遂殺而奪之

通鑑彥和且死呼曰王暉首惡天子猶赦之我

輩脅從何罪乎

高祖聞之以姑息金全故不究其事尋授以旄

節金全有親吏胡漢筠者勇譎齷齪貪詐殘忍軍府之  
政一以委之高祖聞其事遣吏賈仁紹往代其職且召

漢筠漢筠內疚惶怖金全乃列狀稱疾以聞及仁紹至

漢筠鴆而殺之

馬令南唐書胡漢榮所為多不法晉高祖患之不欲因漢榮以累功臣為選庶

吏賈仁沼代之且召漢榮漢榮教金全留己而不遣金全客龐令圖諫曰仁沼昔事王晏球有大功晏球欲辱賞之仁沼退而不言此天下之忠臣也及頒賜所俘物仁沼悉以分故人親戚之貧者此天下之庶士也宜納仁沼而遣漢榮漢榮聞之夜使人殺令圖而鴆仁沼

天福五年夏高祖命馬全節

為安州刺史使以代金全漢筠自以昔嘗拒命復聞仁

紹二子將訴寘毒之事居不自安乃紿謂金全曰郎吏  
劉珂使健步倍道魚行密傳其意云受代之後朝廷將  
以仁紹之事詰公之罪金全大駭命從事張緯函表送  
款于淮夷淮人遣偽將李承裕以代金全金全即日南  
竄其妓樂車馬珍奇帑藏皆為承裕所奪與其黨數百  
人束身夜出曉至汊川引領北望泣下而去及至金陵  
李昇授以節鎮

馬令南唐書云烈祖以金全為天威統軍遷潤州節度使後卒于江

南

史臣曰延光昔為唐臣綽有令譽洎逢晉祚顯恣狂謀  
既力屈以來降尚靦顏而惜死孟津之歿乃取笑于千  
載也從賓而下俱怙亂以滅身亦何足與議也文進懼  
強敵之威金全為輿臺所賣事雖弗類叛則攸同咸附  
島夷皆可醜也

舊五代史卷九十七

舊五代史卷九十七攷證

晉列傳十二范延光傳改封高平郡王 案歐陽史作

東平郡王

延光謂門人李式曰 歐陽史作謀於副使李式

楊光遠傳唐天成中以明宗改御名為亶以偏傍字犯  
之始改光遠 案是書唐紀清泰二年楊檀始改名  
光遠非天成中即改名也

光遠入朝面奏維翰擅權高祖以光遠方有功于國乃



出維翰鎮相州光遠為西京留守 案通鑑攷異云  
晉高祖實錄天福三年壬辰維翰崧罷樞密使庚子  
光遠始入朝對于便殿十一月戊申光遠為西京留  
守天福四年閏七月壬申維翰出為相州節度使與  
此傳先後互異

其碑石無故自折 案歐陽史作碑石既立天大雷電  
擊折之

盧文進傳文進字國用 案遼史太祖紀神冊元年晉

幽州節度使國用來降二年晉新州裨將盧文進殺  
節度使李文矩來降則國用與文進顯係二人然天  
顯元年又書盧龍軍節度使盧國用叛奔于唐即文  
進歸唐之事也疑文進入遼以後遂以字行修遼史  
者雜採諸書誤作兩人耳

行軍司馬馮知兆 馮知兆南唐書作姚知兆歐陽史  
與是書同

李金全傳軍校武彥和 案歐陽史南唐書俱作武克

和通鑑從是書

親吏胡漢筠 胡漢筠歐陽史及南唐書俱作胡漢榮  
通鑑從是書

遣吏賈仁紹 案仁紹通鑑作仁沼考異云薛史作仁  
紹今從實錄歐陽史南唐書與通鑑同

扎拉舊作則剌今改

舊五代史卷九十七攷證

欽定四庫全書

舊五代史卷九十八

宋門下侍郎參知政事監修國史薛居正等撰

晉書第二十四

列傳十三

安重榮朔州人祖從義利州刺史父全勝州刺史振武  
蕃漢馬步軍都指揮使重榮有膂力善騎射唐長興中  
為振武道巡邊指揮使犯罪下獄時高行周為帥欲殺

之其母赴闕申告樞密使安重誨陰護之奏于明宗有  
詔釋焉張敬達之圍晉陽也高祖聞重榮在代北使人  
誘之重榮乃召邊士得千騎赴焉高祖大喜誓以土地  
及即位授成德軍節度使累加至使相自梁唐已來藩  
侯郡牧多以勲授不明治道例為左右羣小感亂賣官  
鬻獄割剝蒸民率有貪猥之名其實賄賂半歸于下惟  
重榮自能鉤距凡有爭訟多庭辯之至于倉庫耗利百  
姓科徭悉入于已諸司不敢窺覲嘗有夫婦共訟其子

不孝者重縈面加詰責抽劔令自殺之其父泣曰不忍也其母詬詈伏劔逐之重縈疑而問之乃其繼母也因叱出自後射之一箭而斃聞者莫不快意由此境內以為強明大得民情重縈起于軍伍暴得富貴復覩累朝自節鎮遽升大位每謂人曰天子兵強馬壯者當為之寧有種耶又以奏請過當為權臣所否心常憤憤遂畜聚亡命收市戰馬有飛揚跋扈之志

通鑑帝之遣重縈伐秘瓊也戒之曰

瓊不受代當別除汝一鎮勿以力取恐為患滋深重縈由是以帝為怯謂人曰秘瓊匹夫耳天子尚畏之況我

以將相之重  
士民之象乎

嘗因暴怒殺部校賈章以謀叛聞章有女

一人時欲捨之女曰我家三十口繼經兵亂死者二十  
八口今父就刑存此身何為再三請死亦殺之鎮人由  
是惡重榮之酷而嘉賈女之烈焉天福中朝廷姑息契  
丹務安邊塞重榮每見蕃使必以箕踞慢罵會有美稜  
數十騎由其境內交言不遜因盡殺之契丹主大怒責  
讓朝廷朝廷隱忍未即加罪重榮乃密搆吐渾等諸族  
以為援助上表論之其累曰臣昨據熟吐渾節度使白

承福赫連公德等各領本族三萬餘帳自應州地界奔  
歸王化續準生吐渾並渾瑊苾兩突厥三部落南北將  
沙陀安慶九府等各領部族老小并牛羊車帳甲馬七  
入路慕化歸奔俱至五臺及當府地界已來安泊累據  
告勞具說被契丹殘害平取生口率畧羊馬凌害至甚  
又自今年二月後來須領點檢壯強置辦人馬衣甲告  
報上秋向南行營諸蕃部等實恐上天不祐殺敗後隨  
例不存家族所以預先歸順兼隨府族各量點檢強壯



人馬約十萬衆人準沿河名項及山前山後逸利越利  
諸族部落等首領並差人各將契丹所授官告職牒旗  
號來送納例皆號泣告勞稱被契丹凌虐憤惋不已情  
願點集甲馬會合殺戮續又朔州節度使趙崇與本  
城將校殺偽節度使劉山尋已安撫軍城乞歸朝廷臣  
相次具奏聞昨奉宣頭及累傳聖旨令臣凡有往復契  
丹更須承奉當俟彼生頭角不欲自起釁端貴守初終  
不愆信誓仰認睿旨深惟匿瑕其如天道人心至務勝

殘去虐須知機不可失時不再來竊以諸蕃不招呼而自至朔郡不攻伐以自歸蓋繫人情盡由天意更念諸陷蕃節度使等本自勲勞早居富貴沒身邊塞遭酷虐以異常企足朝廷冀傾輸而不已如聞傳檄盡願倒戈如臣者雖是愚蒙粗知可否不思忌諱罄寫丹衷細具敷陳冀裨萬一其表數千言大抵指斥高祖稱臣奉表罄中國珍異貢獻契丹凌虐漢人竟無厭足又以此意為書遺諸朝貴及蕃鎮諸侯高祖憂其變也遂幸鄴都

以詔諭之凡有十焉其畧曰爾身為大臣家有老母忿  
不思難棄君與親吾因契丹而興基業爾因吾而致富  
貴吾不敢忘爾可忘耶且前代和親只為安邊今吾以  
天下臣之爾欲以一鎮抗之大小不等無自辱焉重榮  
愈恣縱不悛雖有此奏亦密令人與契丹幽州師劉晞  
結託蓋重榮有內顧之心契丹幸我多事復欲侵吞中  
國契丹之怒重榮亦非本志也時重榮嘗與北來蕃使  
並轡而行指飛鳥射之應弦而落觀者萬衆無不快抃

蕃使因輟所乘馬以慶之由是名振北方自謂天下可  
以一箭而定也又重榮素與襄州安從進連結及聞從  
進將議起兵而奸謀乃決天福六年冬大集境內飢民  
衆至數萬揚旌向闕聲言入覲朝廷遣杜重威帥師禦  
之遇于宗城軍纔成列有賊將趙彥之臨陣卷甲來奔  
重榮方戰聞彥之背已大恐退于輜重中王師因而擊  
之一鼓而潰重榮與十餘騎北走其下部衆屬嚴冬寒  
冽殺戮及凍死者二萬餘人重榮至鎮取牛馬草旋為

甲使郡人分守夾城以待王師

宋史解暉傳安重榮反鎮州因舉兵向闕至宗

城晉師逆戰大破之暉募軍中壯士百餘夜擣賊壘殺殺獲甚衆暉頻中流矢而督戰自若顏色不撓以功遷

列校杜重威至有部將自西郭水門引官軍入焉殺守陴

百姓萬餘人重威尋害導者自收其功重榮擁吐渾數

百匿于牙城重威使人襲而得之斬首以進高祖御樓

閱其浮馱宣露布訖遣漆其頭顱函送契丹

五代史補安重榮出

鎮常懷不軌之計久矣但未發居無何庭中產朱鬃白馬黑鴉主丑色離以為鳳乃欣然謂天命在已遂舉兵反指揮以取宗嶺路以向闕時父老聞之往往竊議曰事不諧矣且王姓安氏曰鞍得背而穩何不取路貝州

若由宗我是戰及于繫得無危乎  
未幾與王師先鋒遇一戰而敗

安從進

歐陽史從進其先索葛部人也初事莊宗為護  
駕馬軍都指揮使領貝州刺史明宗時為保義

彰武軍節度使愍帝即位從領順化清泰中徙鎮  
山南東道晉高祖即位加同中書門下平章事天福

六年高祖幸鄴討安重榮少帝以鄭王畱守京師時和

凝請于高祖曰陛下北征臣料安從進必反何以制之

高祖曰卿意將奈何凝曰臣聞之兵法先人者奪人願

陛下為空名宣敕十通授鄭王有急則命將往從進聞

高祖往北遂反少帝以空名授李建崇都金海討之從

進引兵攻鄧州不克進至湖陽遇建崇等大駭以為神速復為野火所燒遂大敗從進自焚

張彥澤其先出于突厥後為太原人也祖父世為陰山府裨將彥澤少有勇力目睛黃而夜有光色顧視若驚獸焉以騎射事後唐莊宗明宗以從戰有功繼領郡守高祖即位擇為曹州刺史從楊光遠圍范延光于鄴以功授華州節度使尋移鎮涇州累官至檢校太保有從事張式者以宗人之分受其知遇時彥澤有子為內職

素不叶父意數行笞撻懼其楚毒逃竄外地齊州捕送  
到闕敕旨釋罪放歸父所彥澤上章請行朝典式以有  
傷名教屢諫止之彥澤怒引弓欲射之式僅而獲免尋  
令人逐式出衙式自為賓從彥澤委以庶務左右羣小  
惡之久矣因此讒搆互來迫脅云書記若不便出斷定  
必遭屠害式乃告病尋醫攜其妻子將奔衍州彥澤遣  
指揮使李興領二十騎追之戒曰張式如不從命即斬  
取頭來式懇告刺史遂差人援送到汾州節度使李周



驛騎以聞朝廷以姑息彥澤之故有勅流式于商州彥澤遣行軍司馬鄭元昭詣闕論請面奏云彥澤若不得張式恐致不測高祖不得已而從之既至決口割心斷手足而死之式父鐸詣闕訴寃朝廷命王周代之周至任奏彥澤在郡惡跡二十六條逃散五千餘戶彥澤既赴闕刑法官李濤等上章謂理其罪高祖下制止令削奪一階一爵而已時以為失刑少帝即位桑維翰復舉之尋出鎮安陽既至折節于士大夫境內稱理旋命領

軍北屯恒定時易州地孤漕運不繼制令刑魏相衛飛  
輓以輸之百姓荷檐纍纍于路彥澤每援之以行見羸  
困者使其部衆代而助之泊至北邊不令百姓深入即  
遣騎士以馬負糧而去往來既速且無邀奪之患聞者  
嘉之陽城之戰彥澤之功出于諸將之右其後與敵接  
戰頻獻捷于闕下咸謂其感高祖不殺之恩補昔年之  
過也開運三年冬契丹旣南牧杜重威具決瀛州彥澤  
為契丹所啖密已變矣乃通款于戎王請為前導因促

騎說重威引軍沿滹水西援常山旣而與重威通謀及王師降于中渡契丹主遣彥澤統二千騎趨京師以制少帝且示公卿逃民以存撫之意彥澤以是歲十二月十六日夜自封丘門斬關而入以兵圍宮城翌日遷帝于開封府舍凡內帑奇貨悉輦歸私邸仍縱軍大掠兩日方止

東都事畧李處耘傳云居京師遇張彥澤之時暴處耘善射獨當里門殺數十人里中賴之

桑維翰為開府尹彥澤召至麾下待之不以禮維翰責曰去年拔公于罪人之中復領大鎮授以兵權何負恩

一至此耶彥澤無以對是夜殺維翰盡取其家財彥澤自謂有功于契丹晝夜以酒樂自娛當在京巡檢之時出入騎從常數百人旗幟之上題曰赤心為主觀者無不竊笑又所居第財貨山積楚國夫人丁氏即少帝弟曹州節度使延煦之母也有容色彥澤使人取之太后遲迴未與彥澤立遣人載之而去其負國欺君也如是數日之內恣行殺害或軍士擒獲罪人至前彥澤不問所犯但瞋目出一手豎三指而已軍士承其意即出外

斷其腰領焉彥澤與閤門使高勲不協因乘醉至其門害其仲父季弟暴屍于門外及契丹帳泊于北郊勲訴寃于戎王時戎王已怒彥澤剽掠京城遂令鎖之仍以彥澤罪惡宣示百官及京城士庶且云彥澤之罪合誅與否百官連狀具言罪在不赦市肆百姓亦爭投狀疏彥澤之罪戎王知其重怒遂令棄市仍令高勲監決斷腕出鎖然後刑之勲使人剖其心以祭死者市人爭其肉而食之

五代史補李濤常憤張彥澤殺邠州幕吏張式而取其妻濤率同列上疏請誅彥澤以謝

西土高祖方姑息武夫竟不從未幾契丹南侵至中渡橋彥澤首降戎王喜命以本軍統蕃部控弦之士先入京師彥澤自以功不世出乃挾宿憾殺開封尹桑維翰濤聞之謂親知曰吾曾上疏請誅彥澤今國家失守彥澤所為如此吾之首領容可保乎然無可奈何誰能伏藏溝瀆而取辱耶于是自寫門狀求見彥澤其狀云上疏請殺太尉人李濤謹隨狀納命彥澤覽之欣然降堦迎之然濤未安復曰太尉果然相恕乎彥澤澤曰覽公門狀見納命二字使人怒氣頓息又何憂哉濤素滑稽知其必免又戲為伶人詞曰太尉既相恕何不將壓驚絹來彥澤大笑卒善待之

趙德鈞本名行實幽州人也少以騎射事滄州連帥劉守文守文為弟守光所害遂事守光署為幽州軍校及

唐莊宗代幽州德鈞知其必敗乃遁歸莊宗莊宗善待之賜姓名曰紹斌累歷郡守從平梁遷滄州節度使同光三年移鎮幽州明宗即位遂歸本姓始改名德鈞其子延壽尚明宗女興平公主故德鈞尤承倚重天成中定州王都反契丹遣特哩領精騎五千來援都至唐河為招討使王晏球所敗會霖雨相繼所在泥淖敗兵北走人馬饑疲德鈞于要路邀之盡獲餘衆擒特哩袞已下首領數十人獻于京師明年王都平加兼侍中頃

之加東北西招討使德鈞奏發河北數鎮丁夫開王馬口至游口以通水運凡二百里又于閭溝築壘以戍兵守之因名良鄉縣以備鈔寇又于幽州東築三河城北接薊州頗為形勝之要部民由是稍得樵牧德鈞鎮幽州凡十餘年甚有善政累官至檢校太師兼中書令封北平王

遼史天贊六年遣人以詔賜盧龍軍節度使趙德鈞七年趙德鈞遣人進時果蓋德鈞久在邊

境嘗與契丹通好也

清泰三年夏晉高祖起義于晉陽九月契丹

敗張敬達之軍于太原城下唐末帝詔德鈞以本軍由



飛狐路出賊後邀之時德鈞子延壽為樞密使唐末帝命帥軍屯上黨德鈞乃以所部銀鞍契丹直三千騎至鎮州率節度使董溫琪同赴征行自吳兒峪路趨昭義與延壽會于西唐店十一月以德鈞為諸道行營都統以延壽為太原南面招討使遣端明殿學士呂琦齎賜官告兼令犒軍琦從容言天子委任之意德鈞曰既以兵相委焉敢惜死時范延光領兵二萬軍于遼州德鈞欲併其軍奏請與延光會合唐末帝諭延光疑其姦謀

不從德鈞延壽自潞州引軍至團柏谷德鈞累奏乞授  
延壽鎮州節度末帝不悅謂左右曰趙德鈞父子堅要  
鎮州苟能逐退蕃戎要代予位亦所甘心若翫寇要君  
但恐犬兔俱斃朝廷繼馳書詔促令進軍德鈞持疑不  
果乃遣使于契丹原齎金幣求立以為帝仍許晉祖長  
鎮太原契丹主不之許及楊光遠以晉安寨降于契丹  
德鈞父子自團柏谷南走潞州一行兵士投戈棄甲自  
相騰踐死者萬計時德鈞有愛將時賽率輕騎東還漁

陽其部尚有千餘人與散亡之卒俱集于潞州是日潞州節度使高行周亦自北還及至府門見德鈞父子在城闔上行周謂曰某與大王鄉人宜以忠言相告城中無斗粟可食請大王速迎車駕自圖安計無取後悔焉德鈞遂與延壽出降契丹高祖至德鈞父子迎謁于馬前高祖不禮之時契丹主問德鈞曰汝在幽州日所置銀鞍契丹直何在德鈞指示之契丹盡殺于潞之西郊遂鏢德鈞父子入蕃及見國母舒嚕氏盡以一行財寶

及幽州田宅籍而獻之國母謂之曰汝父子自覓天子

何也德鈞俛首不能對

通鑑太后問曰汝近者何為在太原德鈞曰奉唐主之命太后

曰汝從吾兒求為天子何妄語耶又自指其心曰此不可欺也又曰吾兒將行吾戒之云趙大王若引兵北向榆關亟須引歸太原不可救也汝欲為天子何不先擊退吾兒徐圖亦未晚汝為人臣既負其主不能擊敵又欲乘亂邀利所為如此復面又問田宅何在曰臣在幽目求生乎德鈞俛首不能對

州國母曰屬我矣又何獻也天福二年夏德鈞卒于契

丹

契丹國志德鈞鬱鬱不多食踰年而死德鈞既卒國主釋延壽而用之

延壽本姓劉氏父曰祁常山人也常任蓆令梁開平初

滄州節度使劉守文陷其邑時德鈞為偏將獲延壽并

其母种氏遷養之為子延壽姿貌奸柔稍涉書史尤好

賓客亦能為詩

太平廣記引趙延壽傳云延壽幼習武畧即戎之暇時復以篇什為意嘗在北

庭賦詩曰占得高原肥草地夜深生火折林梢南人聞者傳之

及長尚明宗女興平公

主初為汴州司馬明宗即位授汝州刺史歷河陽宋州

節度使入為上將軍充宣徽使遷樞密使兼鎮徐州及

高祖起義于晉陽唐末帝幸懷州委延壽北伐後高祖

至潞州延壽與父德鈞俱陷北庭未幾契丹主以延壽

為幽州節度使封燕王尋為樞密使兼政事令天福末契丹與少帝絕好契丹主委延壽以圖南之事許以中原帝之延壽乃導誘蕃戎蠶食河朔諸軍既降于中渡戎王命延壽就寨安撫諸軍仍賜龍鳳赭袍使衣之而往謂之曰漢兒兵士皆爾有之爾宜親自慰撫延壽至營杜重威李守貞已下皆迎謁于馬前及戎王入汴時降軍數萬皆野次于陳橋戎王慮其有變欲盡殺之延壽聞之遽請見于戎王曰臣伏見今日已前皇帝百戰

千征始收得晉國不知皇帝自要治之乎為他人治之乎戎王變色曰爾何言之過也朕以晉人負義舉國南征五年相殺方得中原豈不自要為主而為他人耶卿有何說速奏朕來延壽曰皇帝嘗知吳蜀與晉朝相殺否曰知延壽曰今中原南自安申西及秦鳳沿邊數千里竝是兩界守戍之所將來皇帝歸國時又漸及炎蒸若吳蜀二寇交侵中國未知如許大世界教其兵馬禦捍苟失隄防豈非為他人取也戎王曰我弗知也為之

奈何延壽曰臣知止國之兵當炎暑之時沿吳蜀之境  
難為用也未若以陳橋所聚降軍團併別作軍額以備  
邊防戎王曰我念在壺關失斷陽城時亦會言議未獲  
區分致五年相殺此時入手如何更不翦除延壽曰晉  
軍見在之數如今還似從前盡在河南誠為不可臣請  
遷其軍竝其家口于鎮定雲朔間以處之每歲差伊分  
番于河外沿邊防戎斯上策也戎王忻然曰一取大王  
商量由是陳橋之衆獲免長平之禍焉延壽在汴久之



知戎王無踐言之意乃遣李崧達語于戎王求立為  
皇太子崧不得已而言之戎王曰我于燕王無所愛惜  
但我皮肉堪與燕王使用亦可割也何況他事我聞皇  
太子天子之子合作燕王豈得為之也因命與燕王加  
恩時北來翰林學士承旨張礪擬延壽為中京留守大  
丞相錄尚書事都督中外諸軍事樞密使燕王如故戎  
王覽擬狀索筆圍却錄尚書事都督中外諸軍事之字  
乃付翰林院草制焉又以其子匡贊為河中節度使延

壽在汴州復娶明宗小女為繼室先是延州節度使周密為其子廣娶焉已納財畢親迎有日矣至是延壽奪取之契丹主自汴迴至邢州命升延壽坐在契丹左右相之上契丹主死延壽下教于諸道稱權知南朝軍國事是歲六月一日為永康王烏裕所鎮籍其家財分給諸部尋以延壽入國竟卒于契丹子贊歷漢周兩朝累授節鎮及統軍使仕皇朝歷廬延邠鄜等四鎮焉

張礪字夢臣磁州滏陽人也祖慶父實世為農礪幼嗜

學有文藻在布衣時或覩民間爭競必為親詣公府辨其曲直其負氣也如此唐同光初擢進士第尋拜左拾遺直史館會鄧崇韜伐蜀奏請礪掌軍書蜀平崇韜為魏王繼岌所誅時崇韜左右親信皆懼禍奔逃惟礪詣魏王府地慟哭久之時人皆服其高義及魏王班師礪從副招討使任還東歸至利州會康延孝叛迴據漢州圍奉魏王命迴軍西討延孝時礪獻謀于園請伏精兵于後先以羸師誘之園深以為然延孝本驍將也任園

乃儒生也延孝聞園至又覩其羸師殊不介意及戰酣園發精兵以擊之延孝果敗遂擒之以歸是歲四月五日至鳳翔內官向延嗣奉莊宗命令誅延孝監軍李延襲已聞洛中有變故留延孝且害任園之功故也園未決礪謂園曰此賊構亂遂致凱旋差晚且明公血戰擒賊安得違詔養禍是破檻放虎自貽其咎也公若不決余自殺此賊任園不得已遂誅延孝天成初明宗知其名召為翰林學士再丁父母憂服闋皆復入為學士歷

禮部兵部員外郎知制誥充職未幾父之妾卒初妾在世礪以久侍先人頗亦敬奉諸幼子亦以祖母呼之及卒礪疑其事詢于同寮未有以對礪即託故歸于滏陽間居三年不行其服論情制宜識者韙之清泰中復授尚書比部郎中知制誥依前充學士高祖起于晉陽唐末帝命趙延壽進討又命翰林學士和凝與延壽偕行礪素輕凝慮不能集事因自請行唐末帝慰而許之及唐軍敗于團柏谷與延壽俱敗于契丹契丹以舊職縻

之累官至吏部尚書契丹入汴授右僕射平章事集賢  
殿大學士隨至鎮州會契丹主卒永康王北去蕭翰自  
東京過常山乃引鐵騎圍其第時礪有疾方伏枕翰見  
礪責之曰爾言于先帝云不得任蕃人作節度使如此  
則社稷之永矣又先帝來時令我于汴州大內安下爾  
言不可又我為汴州節度使爾在中書何故行帖與我  
礪抗聲而對辭氣不屈翰遂鎖礪而去

遼史礪抗聲曰  
此國家大體安

危所繫吾實言之欲  
殺即殺奚以鎖為

鎮州節度使滿達尋解其鎮是夜

以疾卒家人燼其骨歸葬于滏陽礪素耿直嗜酒無檢  
始陷契丹時曾背契丹南歸為追騎所獲契丹主怒曰  
爾何捨我而去礪曰礪漢人也衣服飲食與此不同生  
不如死請速就刃契丹主顧通事高唐英曰我常戒爾  
輩善待此人致其逃去過在爾輩因答唐英一百其為  
契丹主善待也如此礪平生抱義憐才急于契拔聞人  
之善必攘袂以稱之見人之貧亦倒篋以濟之故死之  
之日中朝士大夫亦皆嘆惜焉

蕭翰者契丹諸部之長也父曰阿巴劉仁恭鎮幽州阿巴曾引衆寇平州仁恭遣驍將劉鴈郎與其子守光率五百騎先守其州阿巴不知為郡人所紿因赴牛酒之會為守光所擒契丹請贖之仁恭許其請尋歸阿巴妹為按巴堅妻則契丹主德光之母也翰有妹亦嫁于德光故國人謂翰為國舅契丹入東京以翰為宣武軍節度使契丹比無姓氏翰將有節度之命乃以蕭為姓翰為名自是翰之一族皆稱姓蕭契丹主北去畱翰以鎮



河南時漢高祖已建號于太原翰懼將北歸慮京師無主則衆皆為亂乃遣蕃騎至洛京迎唐明宗幼子許王從益知南朝軍國事從益至翰率蕃將拜于殿上翌日翰乃輦其實貨鞍轡而北漢人以許王既立不復為亂果中其狡計翰行至鎮州遇張礪翰以舊事致忿就第數其失而鎖之翰歸本國為永康王烏裕所鎖尋卒于本土

劉晞者涿州人也父濟雍累為本郡諸邑令長晞少以

儒學稱于鄉里嘗為唐將周德威從事後陷于契丹契  
丹以漢職縻之天福中契丹命晞為燕京畱守嘗于契  
丹三知貢舉歷官至同平章事兼侍中隨契丹入汴授  
洛京畱守會河陽軍亂晞走許州又奔東京蕭翰遣兵  
援晞至洛下契丹主死晞自洛復至東京隨蕭翰北歸  
遂畱鎮州漢初與滿達勒同奔定州後卒于北蕃

契丹  
國志

劉珂晞之子也尚  
世宗妹燕國公主

崔廷勳不知何許人也

通鑑注引宋白曰  
廷勳本河內人

形貌魁偉美

鬚髯幼陷北庭歷仕至雲州節度使官至侍中契丹入  
汴遷少帝于封禪寺遣廷勲以兵防守尋授河陽節度  
使甚得民情契丹北行武行德率軍趨河陽廷勲為行  
德所逐乃與奚王伊喇保懷州尋以兵反攻行德行德  
出戰為廷勲所敗及契丹主死遂歸鎮州漢初與滿達  
同奔定州後没于北蕃

史臣曰帝王之尊必由天命雖韓信彭越之勇吳淠淮  
南之勢猶不可以妄冀而况二安之庸昧相輔為亂固

宜其自取滅亡也後之擁強兵涖重鎮者得不以為鑒乎彥澤狼子野心盈貫而死晚矣德鈞諸人與晉事相終始故附見于茲焉



舊五代史卷九十八

舊五代史卷九十八改證

晉列傳十三安重榮傳高祖聞重榮在北使人誘之

案歐陽史作使張穎陰招重榮

趙延壽傳未幾契丹主以延壽為幽州節度使封燕王

案遼史云德鈞卒以延壽為幽州節度使封燕王

與是書同契丹國志會同六年以延壽為盧龍節度

使八年南征以延壽為魏博節度使封燕王與是書

異



尋為樞密使兼政事令 案遼史天顯末以延壽妻在  
晉詔取之以歸自是益激昂圖報會同初帝幸其弟  
加政事令不言延壽為樞密使攷契丹國志云會同  
改元參用蕃漢以延壽為樞密使兼政事令與是書  
同

燕王如故 案遼史會同七年正月己丑授延壽魏博  
等州節度使封魏王延壽本傳亦言其先封燕王改  
封魏王是延壽入汴時已為魏王也是書始終稱為

燕王與遼史異

蕭翰傳尋卒于本土 案遼史翰後以謀反伏誅與是

書異

美稜舊作梅里今改 特哩袞舊作惕隱今改 舒嚕

舊作迷律今改 烏裕舊作兀欲今改 滿達舊作

麻答今改 阿巴舊作阿鉢今改 按巴堅舊作阿

保機今改 伊喇舊作拽刺今改



舊五代史卷九十八攷證

欽定四庫全書

史部

舊五代史卷九十九至一百二

詳校官編修臣黃壽齡

洗馬臣王坦修覆勘

總校官編修臣朱鈐

校對官編修臣顏崇瀉

謄錄監生臣張灼

欽定四庫全書

舊五代史卷九十九

宋門下侍郎參知政事監修國史薛居正等撰

漢書第一

高祖紀上

高祖睿文聖武昭肅孝皇帝姓劉氏諱暉本名知遠及即位改今諱其先本沙陁部人也四代祖諱湍帝有天  
下追尊為明元皇帝廟號文祖陵曰懿陵

五代會要湍為東漢顯宗

第八子淮陽高祖母隴西李氏追諡明貞皇后曾祖諱

王炳之後

昂晉贈太保追尊為恭僖皇帝廟號德祖陵曰沛陵

五代

會要懿陵沛公皆曾祖母號國太夫人楊氏追諡恭惠

懿陵所遷中朝拜

皇后祖諱僕晉贈太傅追尊為昭獻皇帝廟號翼祖陵

曰威陵祖母魯國太夫人李氏追諡為昭穆皇后皇考

諱瑛事後唐武帝為列校晉贈太師追尊為章聖皇

帝廟號顯祖陵曰肅陵皇妣吳國太夫人安氏追諡章

懿皇后以唐乾寧二年歲在乙卯二月四日遂生帝于

大原帝弱不好弄嚴重寡言及長面紫色目睛多白初  
事唐明宗列于麾下明宗與梁人對柵于德勝時晉高  
祖為梁人所襲馬甲連革斷帝輟騎以授之取斷革者  
自跨之徐殿其後晉高祖感而壯之明宗踐阼晉高祖  
為比京畱守以帝前有護援之力奏移麾下署為牙門  
都校應順初晉高祖鎮常山唐明帝召赴闕會閔帝出  
奔與晉高祖相遇于途遂俱入衛州泊于郵舍閔帝左  
右謀害晉高祖帝密遣御士石敢袖鎧立于晉高祖後

及有變敢擁晉高祖入一室以巨木塞門敢尋死焉帝

卒衆盡殺閔帝左右遂免晉高祖于難

通鑑攷異引漢高祖實錄云是

夜偵知少帝伏甲欲與從臣謀害晉高祖詐屏人對語方坐庭廡帝密遣御士右敢袖劍立于後俄頃伏甲者起敢有勇力擁晉祖入一室以巨木塞門敢力當其鋒死之帝解佩刀遇夜晦以在地葦炬未然者奮擊之衆謂短兵也遂散走地以匿身長垣下聞帝親將李洪信謂人曰石太尉死矣帝隔垣呼洪信曰太尉無恙乃踰垣出就洪信兵共護晉祖殺建謀者以少主授王弘贊清泰元年晉高祖復鎮河

東三年夏移鎮汶陽帝勸晉高祖舉義贊成密計經綸之始中外賴之晉高祖以帝為北京馬步軍都指揮使

及契丹以全軍赴難大破張敬達之衆于晉陽城下有  
降軍千餘人晉高祖將置之于親衛帝盡殺之晉國初  
建加檢校司空充侍衛馬步都指揮使權點檢隨駕六  
軍諸衛事尋改陝州節度使充侍衛親軍馬步都虞候  
契丹主送晉高祖至上黨指帝謂高祖曰此都軍甚操  
刺無大故不可棄之晉高祖入洛委帝巡警都邑肅然  
無敢犯今天福二年夏四月加檢校太保八月改許州  
節度使典軍如故三年夏四月加檢校太傅冬十月授

侍衛親軍馬步軍都指揮使十一月移授宋州加檢校太尉十二月加同平章事時帝與杜重威同制加恩帝憤然不樂懇讓不受杜門不出者數日

通鑑知遠自以有佐命功重威

起于外戚無大功恥與之同制制下數日杜門四表辭不受

晉高祖怒召宰相趙瑩

等議洛帝兵權任歸私第瑩等以為不可乃遣端明殿學士和凝就第宣諭帝乃承命五年三月改鄴都畱守兼侍衛親軍馬步軍都指揮使九月奉詔赴闕晉高祖幸其第六年七月授北京畱守河東節度使七年正月



加侍中時天下大蝗惟不入河東界六月晉高祖崩于  
鄴宮少帝即位加帝檢校太師八年三月進位中書令  
開運元年正月契丹南下契丹主以大軍直抵澶州遣  
蕃將偉王率兵入雁門朝廷以帝為幽州道行營招討  
使帝大破偉王于忻口尋奉詔起兵至土門軍至樂平  
會契丹退乃還三月封太原王七月兼北面行營都統  
二年四月封北平王三年五月加守太尉是月帝誅吐  
渾白承福等五族凡四百人以別部王義宗統其餘衆

九月

案以下有脫文

犯塞帝親率牙兵至朔州南陽武谷大破

之

東都事畧郭進傳契丹屠安陽高祖遣進拒戰契丹敗走以功除刺史

十一月契丹主

率蕃漢大軍由易定抵鎮州杜重威等駐軍于中渡橋

以禦之十二月十日杜重威等以全軍降于契丹十七

日相州節度使張彥澤授契丹命陷京城遷少帝于開

封府帝聞之大駭分兵守境以備寇患天福十二月春

正月丁亥朔契丹主入東京癸巳晉少帝蒙塵于封禪

寺癸卯少帝北遷二月丁巳朔契丹主具漢法服御崇

元殿受朝制改晉國為大遼國大赦天下號會同十年  
是月帝遣牙將王峻奉表于契丹契丹主賜詔褒美呼  
帝為兒又賜木柅一蕃法貴重大臣方得此賜亦猶漢  
儀賜几杖之此也王峻恃柅而歸契丹望之皆避路及  
峻至太原帝知契丹政亂乃議建號焉是月秦州節度  
使何建以其地入于蜀戊辰河東行軍司馬張彥威與  
文武將吏等以中原無主帝威望日隆羣情所屬上牋  
勸進帝謙讓不允自是羣官三上牋諸軍將吏縉黃耆

老相次迫請教答允之庚午陝州屯駐奉國指揮使趙暉候章都頭王晏殺契丹監軍及副使劉愿暉自稱留後契丹因授暉陝州兵馬留後候章為本州馬步軍都指揮使王晏為副都指揮使暉等不受命

宋史王晏傳開運末晏與

本軍都校趙暉忠衛都校候章等戍陝州會契丹至汴遣其將劉愿據陝恣行暴虐晏與暉等謀曰今契丹南侵天下洶洶英雄豪傑固當乘時自奮且聞太原劉公威德遠被人心歸服若殺愿送款河東為天下唱首則取富貴如反掌耳暉等然之晏乃率敢死士數人夜踰城入府署劫庫兵給其徒遲明斬愿首懸府門外衆請暉為帥章為本城副指揮使內外巡檢使兼都虞候遣其子漢倫奉表晉陽

辛未帝于太原

宮受冊即皇帝位制改晉開運四年為天福十二年

丹

國志云漢主仍稱天福年號曰予未忍忘晉也

甲戌帝以晉帝舉族北遷憤惋

久之是日率親兵趨土門路邀迎晉帝至壽陽聞其已過乃還契丹聞帝建號偽制削奪帝官爵以通事耿崇美為潞州節度使高唐英為相州節度使崔廷勲為河陽節度使以為要害之地丁丑磁州賊帥梁暉據相州已卯帝遣都將史弘肇率兵討代州平之初代州刺史王暉叛歸契丹弘肇一鼓而拔之斬暉以徇庚辰權晉

欽定四庫全書

舊五代史

六

州兵馬留後張晏洪奏軍亂殺知州副使駱從朗及括  
錢使諫議大夫趙熙以城歸順時晉州留後劉在明赴  
東京朝于契丹從朗知軍州事帝方遣使張晏洪辛處  
明等告諭登極從朗囚之本城大將藥可儔殺從朗于  
理所州民相害率趙熙三軍請晏洪為留後處明為都  
監辛巳權陝州留後趙暉權潞州留後王守恩並上表  
歸順癸未瀘州賊帥王瓊與其衆斷本州浮橋瓊敗死  
之時契丹以族人朗鄂為檀州節度使契丹性貪虐吏

民苦之瓊為水運什長乃搆夏津賊帥張乙得千餘人  
沿河而上中夜竊發自南城殺守將絕浮航入北城朗  
悟據牙城以拒之數日會契丹救至瓊敗死焉契丹主  
初聞其變也懼甚由是大河之南無久留之意尋遣天  
雄軍節度使杜重威歸鎮三月丙戌朔詔河東管内自  
前稅外雜色徵配一切除放是日契丹主坐崇元殿行  
入閣之禮契丹主以舅蕭翰為宣武軍節度使辛卯權  
延州留後高允權遣判官李彬奏本道節度使周密為

三軍所逐以允權知雷後事上表歸順未幾帝召密赴行在壬辰丹州都指揮使高彥珣殺契丹所命刺史據城歸命壬寅契丹主發自東京還本國是日宿于赤崗至晡有大聲如雷起于敵帳之下契丹自黎陽濟河遂趨相州庚戌帝以北京馬步都指揮使泗州防禦使檢校太保劉崇為太原尹檢校太尉以北京馬步軍都虞候敦從義為鄭州防禦使檢校太保以北京興捷左廂都指揮使李洪信為陳州刺史檢校司徒以興捷右廂



都指揮使尚洪遷為單州刺史檢校司徒以北京武節  
左廂都指揮使蓋萬為蔡州刺史以武節右廂都指揮  
使周暉為濮州刺史以保寧都指揮使朱奉千為隨州  
刺史辛亥吐渾節度使王義宗加檢校太尉以前忻州  
刺史秦習為耀州團練使癸丑以北京副留守檢校司  
徒白文珂為河中節度使檢校太尉夏四月己未以北  
京馬軍都指揮使集州刺史劉信為滑州節度使充侍  
衛馬軍都指揮使檢校太傅以北京隨使右都押衙楊

卯為權樞密使檢校太保以北京武節度指揮使雷州  
刺史史弘肇為許州節度使充侍衛步軍都指揮使檢  
校太傅以北京牢城都指揮使壁州刺史常思為鄧州  
節度使檢校太傅兼權北京馬步軍都指揮使三城巡  
檢使以河東行軍司馬張彥威為同州節度使檢校太  
保以蕃漢兵馬都孔目官郭威為權樞密使檢校司徒  
以河東左都押運扈彥珂為宣徽南院司檢校司徒以  
右都押衙王浩為宣徽北院使檢校司徒以兩使都孔

目官王章為權三司使檢校太保是日契丹主取相州

殺畱後梁暉

宋史李穀傳潛遣河朔酋豪梁暉入據安陽契丹主患之即謀北旋會有告契丹以

城中虛弱者契丹還攻安陽陷其城暉磁州滏陽人少為盜會契丹入汴

暉收集徒黨先入磁州無所侵犯遣使送款于帝暉偵

知相州頗積兵仗且無守備遂以三月二十一日夜與

其徒踰垣而入殺契丹數十人奪器甲數萬計遂據其

城契丹主先遣相州節度使高唐英率兵討之未幾契

丹主至城下是月四日攻拔之遂屠其城翼日契丹主

北去命高唐英鎮之唐英閱城中遺民得男女七百人而已乾祐中王繼弘鎮相州奏于城中得髑髏十餘萬殺人之數從可知也庚申以石州刺史易全章為洛州團練使以前遼州刺史安真為宿州團練使以嵐州刺史孟行超為潁州團練使以汾州刺史武彥弘為曹州防禦使以前憲州刺史慕容信為齊州防禦使以遼州刺史薛瓊為亳州防禦使以沁州刺史李漢韜為汝州防禦使癸亥冊魏國夫人李氏為皇后甲子以皇長子

承訓為左衛上將軍第二子承祐為左衛大將軍第三子承勲為右衛大將軍皇女彭城郡君宋氏封永寧公主皇姪承贊為右衛上將軍以河東節度使官蕪逢吉為中書侍郎同平章事集賢殿大學士以河東觀察判官蕪禹珪為中書侍郎同平章事升府州為節度加永安軍額以振武節度使府州練團使折從阮為永安軍節度使行府州刺史檢校太尉以北京隨使左都押衙劉銖為河陽節度使以河東支使韓祚為左諫議大夫

充樞密直學士乙丑遣史弘肇率兵一萬人趨潞州丙寅以權知潞州軍州事左驍衛大將軍王守恩為潞州節度使檢校太保以權點檢延州軍州事高充權為延州節度使檢校太保以尙嵐軍使鄭謙為忻州刺史遙領應州節度使充忻代二州義軍都部署丁卯以河東都巡館驛沿河巡檢使閻萬進為嵐州刺史領朔州節度使充嵐憲二州義軍都制置戊辰權河陽畱後武行德以城來歸初契丹主將發東京船載五庫兵伏自汴

浮何欲置之于北地遺奉國都虞候武行德部送與軍士千餘人并家屬俱行至河陰軍亂奪兵伏殺契丹監吏家推行德為帥與河陰屯駐軍士合乃自汜水抵河陽河陽偽命節度使崔廷勲率兵拒之兵敗行德等追躡之廷勲棄城而遁行德因據其城

隆平集武行德傳行德陷于契丹偽

請自効因遣送將校數十人護所取尚方鎧甲還契丹至河陰行德謂衆曰我與若等能為邊地鬼也衆素伏其威名皆曰惟命遂攻孟州走其節度使崔廷勲悉以府庫分諸校而權領州事遣其弟行友詣太原勸進

偽命西京留守劉晞棄洛城南走許州遂奔東京洛京

巡檢使方太自署知畱守事未幾大為武行德所害是  
日蕃將耿崇美屯澤州史弘肇遣先鋒將馬誨率兵擊  
之崇美退保懷州崔廷勲以契丹衆攻武行德于河陽  
行德出戰為廷勲所敗汴州蕭翰遣蕃將高年翰將兵  
援送劉晞復歸于洛年翰至殺前澶州節度使潘環于  
洛陽辛未以河陽都部署武行德為河陽節度使檢校  
太尉充一行馬步軍都部署甲戌潞州節度使王守恩  
加檢校太尉以前棣州刺史慕容彥超為澶州節度使



檢校太保丙子契丹主耶律德光卒于鎮之樂城趙延  
壽于鎮州自稱權知國事辛巳陝州節度使趙暉加檢  
校太尉華州節度使兼陝州馬步軍都指揮使侯章加  
檢校太傅以陝府馬步軍副都指揮使兼絳州防禦使  
王晏為晉州節度使檢校太傅以丹州都指揮使權知  
軍州事高彥珣為丹州刺史

隆平集王晏傳云漢祖威名未振而晏等歸之甚善

即授以節度使

舊五代史卷九十九

舊五代史卷九十九攷證

漢高祖紀一帝大破偉王于忻口 案漢祖破偉王是

書作開運元年正月歐陽史漢本紀作三年五月晉  
本紀又載開運元年正月辛丑劉知遠及契丹偉王  
戰于秀容敗之兩紀年月互異應以是書為據

三年五月加太尉是月帝誅吐渾白承福等五族

案歐陽史作八月殺吐渾白承福等族

壬寅契丹主發自東京還本國 案遼史太宗紀作四

月丙辰朔發自汴州與是書異歐陽史及通鑑俱從  
是書作壬寅

殺契丹數十人 案契丹國志作殺遼兵數百

丙子契丹主耶律德光率于鎮之藥城 案遼史太宗

紀四月丁丑萌于藥城與是書異歐陽史及通鑑俱

從是書作丙子

朗鄂舊作朗五今改

舊五代史卷九十九攷證

欽定四庫全書

舊五代史卷一百

宋門下侍郎參知政事監修國史薛居正等撰

漢書第二

高祖紀下

天福十二年夏五月乙酉朔契丹所署大丞相政事令  
東京留守燕王趙延壽為永康王烏裕所繫既而烏裕  
召蕃漢臣寮于鎮州牙署矯戎王遺詔命烏裕嗣位于

是發京成服辛卯詔取五月十二日車駕南幸甲午以  
判太原府事劉崇為北京留守命皇子承訓武德使李  
暉大內巡檢丙申帝發河東取陰地關路幸東京時星

官言太歲在午不利南巡故路出陰地丁酉史弘肇奏

澤州刺史翟令奇以郡來降

宋史李萬超傳史弘肇路經澤州刺史翟令奇堅

壁拒命萬超馳至城下諭之曰今契丹北遁天下無主并州劉公仗大義定中王所向風靡後服者族益早圖之令奇乃開門迎納弘肇即留萬超權州事是日契丹所署汴州節度使蕭

翰迎鄆國公李從益至東京請從益知南朝軍國事已

亥蕭朝發離東京北去乙巳契丹永康王烏裕自鎮州  
還蕃行次定州以定州節度副使耶律忠為定州節度  
使孫方簡為雲州節度使方簡不受命遂歸狼山戊申  
車駕至絳州本州刺史李從朗以郡降初契丹遣偏校  
成霜卿曹可璠等守其郡帝建義之始不時歸命及車  
駕至帝耀兵于城下不令攻擊從朗等遂降六月乙卯  
契丹河中節度使趙贊起復河中節度使是日契丹右  
僕射兼中書侍郎平章事張礪卒于鎮州丙辰車駕至

洛兩京文武百寮自新安相次奉迎鄆國公李從益唐  
明宗淑妃王氏皆賜死于東京甲子車駕至東京丙寅  
以漢州就糧歸捷指揮使張建雄為濮州刺史以金州  
守禦指揮使康彥環為金州防禦使建雄彥環皆因亂  
害本州刺史自知州事故有是命以北京知進奏王從  
璋為內客省使戊辰制大赦天下應天福十二年六月  
十五日昧爽已前天下見禁罪人已結正未結正已發  
覺未發覺除十惡五逆外罪無輕重咸赦除之諸州去



年殘稅並放東西京一百里內於今年夏稅一百里外  
及京城今年屋稅並放一半契丹所授職任不議改更  
諸貶降官未量移與量移已量移者與叙錄徒流入並  
放還應係欠省錢家業抵當外並放宜以國號為大漢  
年家號依舊稱天福云已已詔青州襄州復為節鎮曹  
陳二州依舊為郡壬申北京留守劉崇加同平章事以  
中書舍人劉繼儒為宗正卿翰林學士承旨尚書兵部  
侍郎張允落職守本官以尚書左丞張昭為吏部侍郎

以左散騎常侍邊歸讜為禮部侍郎以左散騎常侍王  
仁裕為戶部侍郎充翰林學士承旨以右諫議大夫張  
沆為左散騎常侍充翰林學士以戶部侍郎李式為光  
祿卿以翰林學士尚書禮部侍郎邊光範為衛尉卿甲  
戌詔文武臣僚每遇內殿起居輪次上封事丁丑以湖  
南節度使馬希範卒輟視朝三日是月契丹所命相州  
節度使高唐英為屯駐指揮使王繼弘楚暉所殺秋七  
月己丑以御史中丞趙上交為太僕卿以戶部侍郎邊

蔚為御史中丞甲午武安軍節度副使水陸諸軍副都  
指揮使判內外諸司江南西道觀察等使檢校太尉馮  
希廣可檢校太師兼中書令行潭州大都督天策上將  
軍充武安軍節度湖南觀內觀察使江南諸道都統封  
楚王丙申以鄴都留守天雄軍節度使檢校太師守太  
傅兼中書令衛國公杜重威為宋州節度使加守太尉  
以宋州節度使檢校太師兼中書令高行周為鄴都留  
守加守太傅以鄆州節度使檢校太師兼侍中李守員

為中節度使加兼中書令以河中節度使檢校太尉

趙贊為晉昌軍節度使

宋史趙贊傳贊懼漢疑已潛遣親吏趙僊奉表歸蜀判官李恕

者趙延壽賓佐深所委賴至家事亦參之及贊出鎮從為上介至是恕語贊曰燕王入遼非所願也漢方建國必務懷柔公若泥首歸朝必保富貴狼狽入蜀理難萬全儻若不容後悔無及公能聽納請先入朝為公申理贊即遣恕詣闕漢祖見恕問贊何以附蜀恕曰贊家在燕蒞身受契丹之命自懷憂恐謂陛下終不能容招引西軍蓋圖苟免臣意國家甫定務安臣民所以令臣乞哀求覲漢祖曰贊之父子亦吾人也事契丹出于不幸今聞延壽落于陷穽吾忍不容贊耶起未還贊已離鎮入朝即命為左驍衛將軍以晉昌軍節

度使張彥超為鄜州節度使加檢校太師庾子以徐州

節度使檢校太師同平章事岐國公符彥鄉為兗州節度使加兼侍中以鄧州節度使檢校太師王周為徐州節度使加同平章事以許州節度使檢校太保劉重進為鄧州節度使加檢校太傅以兗州節度使檢校太師兼侍中安審琦為襄州節度使檢校太師莒國公李從敏為西京留守加同平章事以鳳翔節度使檢校太師同平章事侯益依前鳳翔節度使加兼侍中辛丑故守司空兼門下侍郎平章事譙國公劉昫贈太保甲辰華

州節度使侯章同州節度使張彥威涇州節度使史威  
並加檢校太尉以晉昌軍節度使檢校太保劉銖為青  
州節度使加檢校太尉同平章事以河中節度使檢校  
太尉白文琦為鄆州節度使加同平章事以青州節度  
使楊承信為安州節度使加檢校太傅滑州節度使兼  
侍衛馬軍都指揮使劉信許州節度使兼侍衛步軍都  
指揮使史弘肇並加檢校太尉庾戍以司天監任廷浩  
為殿中監以司天少監杜昇為司天監是月契丹永康

王烏裕囚祖母舒嚕氏于木葉山閏月辛酉以左衛上將軍甫皇立為太子太師致仕乙丑禁造契丹樣鞍轡器械服裝故開封尹桑維翰贈尚書令故西京留守景延廣贈中書令以前衛尉卿薛仁謙為司農卿丙寅唐故樞密使郭崇韜贈中書令故河中節度使安重誨贈尚書令故華州節度使毛璋贈侍中故汴州節度使朱守殷贈中書令丁卯故清州節度使楊光遠贈尚書令追封齊王仍令所司追謚立碑唐故河中節度使西平

王朱友謙追封魏王故樞密使馮贇贈中書令故河陽  
節度使判六軍康義誠贈中書令故西京留守京兆尹  
王恩同故邠州節度使藥彥稠故襄州節度使安重進  
故鎮州節度使安重榮並贈侍中庚午以前延州留後  
薛可言為宣徽北院使以監察御史王度為樞密直學  
士新授宋州節度使杜重威據鄴都叛詔削奪重威官  
爵貶為庶人以高行周為行營都部署率兵進討辛未  
以權樞密使楊邠為樞密使加檢校太傅以權樞密副



使郭威為副樞密使加檢校太保以權三司使王章為  
三司使加檢校太傅壬申故晉昌軍節度使趙在禮贈  
中書令故曹州節度使石贇贈侍中故滑州節度使皇  
甫遇贈中書令故同州節度使劉繼勳故貝州節度使  
梁漢璋皆贈太尉故宣徽使孟承誨贈太保丁丑有彗  
出于張旬日而滅己卯陝州節度使趙暉加階爵晉州  
節度使王晏加檢校太尉河陽節度使武行德加階爵  
延州節度使高允權加檢校太尉鄧州節度使常思加

檢校太尉移鎮潞州庚辰追尊六廟以太祖高皇帝世祖光武皇帝為不祧之廟高曾已下四廟追尊謚號已載于前矣是月權太常卿張昭上六廟樂章舞名太祖高皇帝室酌獻請依舊奏武德之舞世祖光武皇帝室酌獻請依舊奏大武之舞文祖明元皇帝室酌獻請奏靈長之舞德祖恭僖皇帝室酌獻請奏積善之舞翼祖昭獻皇帝室酌獻請奏顯仁之舞顯祖帝聖皇帝室酌獻請奏章慶之舞其六廟歌詞文多不錄八月壬午

朔鎮州駐屯護聖左廂都指揮使白再筠等逐契丹所

命節度使滿達

舊作麻答  
今改正

復其城滿達與河陽節度使

崔廷勲洛京留守劉晞並奔定州馳驛以聞庚寅以洛

州團練使薛懷讓為邢州節度使辛卯詔恒州復為

鎮州順國軍復為成德軍乙未以護聖左廂都指揮使

恩州團練使白再筠為鎮州留後丙申詔天下凡關賊

盜不計贓物多少案驗不虛並處死以兩浙節度使守

太師兼中書令吳越國王錢弘佐薨廢朝三日丙午以

吐渾府節度使檢校太尉王義宗為沁州刺史依前吐渾節度使已酉以刑部尚書竇貞固為吏部尚書是日薛懷讓奏收復邢州殺偽命節度副使知州事劉鐸初懷讓為洺州防禦使契丹蒲達發健步督洺州糧運懷讓殺之以聞帝遣郭從義與懷讓攻取邢州蕃將楊衮來援鐸懷讓拒之不勝退保洺州敵騎掠其部民大被其苦會鎮州逐蒲達楊衮收兵而退鐸乃上表請命懷讓乘其無備遣人給鐸云奉詔襲契丹請置頓于郡鐸

開門迎之即為懷讓所害時人寃之鐸初受契丹命為邢州都指揮使及永康王以高奉明為節度使蒲達署鐸為邢州副使兼都指揮使帝至東京奉明歸鎮州令令知邢州事至是遇害庚戌文武百寮上表請以二月四日降誕日為聖壽節從之前晉昌軍節度副使李肅可左驍衛上將軍致仕是月遣使諸道和市戰馬九月甲子宰臣蘇逢吉兼戶部尚書蘇禹珪兼刑部尚書丁卯以吏部侍郎權判太常卿事張昭為太常卿戊辰故

易州刺史郭璘贈太傅甲戌宰臣蘇逢吉加左僕射監修國史蘇禹珪加右僕射集賢殿大學士以吏部尚書

竇貞國為守司空兼門下侍郎平章事弘文館大學士

宋史竇貞固傳初帝與貞固同事晉祖甚相得時蘇逢吉蘇禹珪自霸府僚佐驟居相位思得舊臣冠首以貞固特重寡言有時望乃拜以翰林學士行中書舍人李司空門下侍郎平章事

濤為中書侍郎兼戶部尚書平章事

宋史李濤傳杜仲威據鄴叛高祖命

高行周慕容彥超討之二帥不協濤密疏親征高祖覽奏以濤堪任宰輔即拜中書侍郎兼戶部侍郎平章事

是日權太常卿張昭上疏奏改一代樂名戊寅詔以杜

重威叛命取今月二十九日暫幸澶魏已卯以前樞密使李崧為太子太傅以前左僕射和凝為太子太保庚辰車駕發京師冬十月癸未以太子太保李璘為司徒以太子太傅盧文紀為太子太師以前磁州刺史李穀為左散騎常侍

宋史李穀傳舊制罷外郎歸本官至是進秩獎之也

甲申車駕次

韋城詔河北諸州見禁罪人自十月五日昧爽以前常赦所不原者咸赦除之壬辰日有黑子如鷄卵丙申以相州留後王繼弘為相州節度使加檢校太傅致鄴都

城下丙午詔都部署高行周督衆攻城帝登高阜以觀之時衆議未欲攻擊副部署慕容彥超堅請攻之是日王師傷夷者萬餘人不克而退十一月壬子雨木冰癸丑日南至從官稱賀于行宮己未湖南奏荆南節度使高從誨叛辛酉雨木冰壬申杜重威上表請命癸酉雨木冰丁丑杜重威素服出降待罪于宮門詔釋其罪鄴都留守天雄軍節度使高行周加守太尉封臨清王以杜重威為檢校太師守太傅兼中書令楚國公己卯以



許州節度使兼侍衛步軍都指揮使史弘肇為宋州節度使同平章事充侍衛親軍馬步軍都指揮以滑州節度使兼侍衛馬軍都指揮使劉信為許州節度使同平章事充侍衛親軍馬步軍副都指揮使以澶州節度使慕容彥超為鄆州節度使同平章事以前定州節度使李殷為貝州節度使以鄭州防禦使郭從義為澶州節度使十二月辛巳朔以護聖左廂都指揮使岳州防禦使李洪信為遂州節度使充侍衛步軍都指揮使以護

聖右廂都指揮使永州防禦尚洪遷為夔州節度使充  
侍衛步軍都指揮使丙戌車駕發鄴都歸京癸巳至自  
鄴都甲午以皇子開封尹承訓薨廢朝三日追封魏王  
丁酉帝舉哀于太平宮庚子司徒李璘薨辛丑以前鄜  
州節度使郭謹為滑州節度使加檢校太尉戊申宿州  
奏部民餓死者八百六十有七人乾祐元年正月辛亥  
朔帝不受朝賀乙卯制大赦天下改天福十三年為乾  
祐元年自正月五日昧爽已前犯罪人除十惡五逆外

罪無輕重赦除之己未改御名為曷辛酉詔諸道行軍副使兩使判官並不得奏薦帶使相節度使許奏掌書記支使節度推官不帶使相節度使只許奏掌書記節度推官其防禦團練判官等聽奏所薦州縣官帶使相節度使許薦三人不帶使相二人防禦團練刺史一人云以前鄧州節度使燕國公馮道為守太師進封齊國公甲子帝不豫庚午以前宗正卿石光贊為太子賓客以太僕卿趙上交為秘書監丁丑故尚書左丞韓祚贈

司徒二十七日丁丑帝崩于萬歲殿時年五十四祕不

發喪庚辰太傅杜重威伏誅

契丹國志云漢主召蘇逢吉楊邠史弘肇入受顧命

曰承祐幼弱後事託在卿輩又曰善防杜重威是日殂逢吉等祕不發喪下詔稱重威父子因朕小疾謗議搆

衆皆斬之磔死于市市人爭啖其肉

二月辛巳朔內降遺制皇子周王承

祐可于柩前即皇帝位是日發哀其年二月太常卿張

昭上謚曰睿文聖武昭肅孝皇帝廟號高祖十一月壬

申塋于睿陵宰臣蘇禹珪撰謚冊哀冊文云

五代史補高祖嘗在

晉祖麾下晉祖既起太原因高祖遂有天下先是豫章有僧號上藍者精于術數自唐末著識云石榴花發石

相聞議者以石榴則晉漢之謂也再  
言石榴者明享祚俱不過二世矣

史臣曰在晉皇天降禍諸夏無君漢高祖肇起并汾邁  
臨汴洛乘虛而取神器因亂而有帝圖雖曰人謀諒由  
天啓然帝昔泣戎藩素虧物望泊登宸極未厭人心徒  
矜拯溺之功莫契來蘇之望良以急于止殺不暇崇仁  
燕薊降師既連營而受戮鄴臺判帥因閉壘以偷生蓋  
撫御以乖方俾征伐之不息及回鑾輅尋墮烏號故雖  
有應運之名而未覩為君之德也

舊五代史卷一百

舊五代史卷一百考證

漢高祖紀下矯戎王遺詔命烏裕嗣位 案遼史世宗  
紀作四月戊寅即皇帝位歐陽史通鑑契丹國志俱  
從是書作五月與遼史異

乙巳契丹永康王烏裕自鎮州還蕃行次定州 案遼  
史作甲申次定州與是書異

河中節度使趙贊起復河中節度使 案遼史世宗  
紀天祿二年十月壬午南京留守魏王趙延壽薨攷

遼天祿二年即漢乾祐二年此時天福十二年延壽  
尚未死也此必因延壽為永康王所鎖而漢人傳其  
已死遂起復其子贇以絕其北向之心耳

攷證一條於乙巳契丹永康王鄂約後

新授宋州節度使杜重威據鄴都叛詔削奪重威官爵  
貶為庶人案通鑑杜重威之叛在七月至閏月庚  
午乃削奪官爵五代春秋歐陽史作閏七月杜重威  
拒命與通鑑異



懷讓遣人給鐸云奉詔襲契丹請置頓于郡 案宋史  
薛懷讓傳懷讓遣人給鐸云我奉詔為邢州帥据是  
書則懷讓實給鐸奉詔襲契丹以庚寅授邢州節度  
使非給之也特託言置頓于郡耳

丙申至鄴都城下 案通鑑作戊戌至鄴都城下與是  
書異

甲午以皇子開封尹承訓薨廢朝三日追封魏王 案  
通鑑辛卯皇子開封尹承訓卒乙未追立為魏王與

是書紀日互異

舊五代史卷一百改證